

Siunnersuummut nassuiaatit

Nassuiaatit nalinginnaasut

1. Aallaqqaasiut

Aalajangiiffigisassatut siunnersuutit ullumikkut siunnersuutip allaffissornikkut aningaasatigullu kingunerisassaannik allaaserinninnermik ilaqartinneqartartussaapput. Piumasaqaatip tamatuma (Inatsisartunut ilaasortat partiilluunniit aalajangiiffigisassatut siunnersuutaat eqqarsaatigalugit) atuukkunnaarsinneqarnissaa kingunerisassanillu allaaserinninnerup tamatumunnga taarsiullugu Naalakkersuisut akissuteqaataannut, pisariaqarpat immikkut immikkoortumi ilanngussamiluunniit, ilaasalernissaa siunnersuutigineqarpoq. Inatsisartut taamaaliornikkut aalajangiinissamut tunngavissamik qulaajarluakkamik qularnaarunneqassapput.

Kingunerisassanik allaaserinninnerit ullumikkornit annertunerulerlutilluunniit (taamatullu aamma annikinnerulerlutilluunniit) sukumiinerulernissaat siunnersuutikkut siunertarineqanngilaq.

Taamaaqataani allanngortitsinerit Inatsisartut suleriaasiata allanngortinneqarnissaanik siunnersuummi 2019-imi Siulittaasoqarfiup saqqummiusnaanut (UKA2019/26) ilaapput.

Siunnersuummut taaneqartumut tunngatillugu Suleriaatsimut Ataatsimiititaliap isumaliutissiissummini oqaatigaa:

”Inatsisartut aalajangiiffigisassaattut siunnersuuteqarnermut atatillugu aningaasatigut allaffissornikkullu kingunerisassat allaaserineqarsimanissaannik ullumikkut piumasaqaataasup ulluinnarni ilaasortarpassuarnit naammassiuminaatsutut misigineqartarnera siunnersuummut tunngaviuvoq. Siunnersuutip eqqarsaatigineqartup kingunerisassaasa qulaajarneqarnissaanut Inatsisartut Allattoqarfiannit ikiorserneqarnissaq aamma/imaluunniit § 37 malillugu apeqquteqarnissaq annertuutigit ilaasortat periarfissatuarisarpaat.

§ 37 malillugu apeqquteqarnissaq pisariaqartillugu, piumasaqaat "aporfissatut" isigineqarsinnaavoq, minnerunngitsumik siunnersuutissamik eqqarsaatigineqartumik suliaqarneq piffissaq tunniussereersimaffissaq sioqqutitsiarlugu aallartinneqarpat, taamalu akissutinik pissarsiniarnissamut piffissaqartoqarani.

Taamaattumik piumasaqaat pakatsinernik kinguneqartarsimavoq.

Aalajangiiffigisassatut siunnersuutip kingunerisassaasa qulaajarneqarsimanissaannik piumasaqaatip tamakkiisumik atuukkunnaarsinneqarnissaa taamaattoq aaqqiissutitut pissusissamisunnigitsutut illersorneqarsinnaanngitsutulluunniit isikkoqarpoq: Inatsisartut - saqqummiussissummi oqaatigineqartutut - qulaajarluarneqarsimasunik tunngaveqarlutik aalajangiisinaanissaat immiini pissusissamisoortumik piumasaqaataavoq, sattaaserluni aalajangiisoqannginniassammat, aalajangiinerup inuiaqatigiinnut qanoq akeqarnissaata naatsorsuutigisariaqarnera, taamatullu aamma nunami innuttaasunut suliffeqarfinnullu sunik kinguneqarnissaa naatsorsuutigisariaqarnersoq, nalullugit.

Taamaattorli siunnersuutip malitsigissavaa eqqarsaatigineqarsinnaammat oqaluuserisassanut siunnersuutini ilanngussaartoqartarsinnaanera kingunerisassai akissuteqaammi qulaajarneqarsinnaanngitsunik, tamanna paasissutissanik katersinissamik imaluunniit nalilersuilluni misissuinernik ima annertutigisunik piumasaqaatitaqassappat qulaajaaneq nassuiaasiornikkut pisariaqarluni. Taamaalilluni allannguutissatut siunnersuutigineqartukkut kingunerisassai ilisimasaqarfiginagit annertuumik sunniuteqarsinnaasunik Inatsisartut aalajangiisinaanissaat ammaanneqassaaq.

Taamatuttaaq siunnersuutip malitsigissavaa, Aningaasaqarnermut Naalakkersuisoqarfimmit uparuarneqartutut, siunnersuuteqartoq periarfissinneqassammat siunnersuuteqarsinnaanissaminut siunnersuutip kingunerisinnaasai ilisimasaqarfiginagit. Tamanna aamma ajoqutaasinnaasutut isigineqarsinnaavoq.

Inatsimmut nassuiaatini takuneqarsinnaavoq Siulittaasoqarfiup tamanna eqqumaffigisimagaa, kisiannilu taamatut siunnersuuteqarnerup siunertarisimagaa kissaatit "ukiuni kingullerni ataavartumik sakkortuumillu Inatsisartuni partiinit amerlanernit sinniisinit saqqummiunneqartarsimasut" naammassineqarnissaat.

Ataatsimiititaliap takusinnaavaa siunnersuut taanna pillugu isummat siullermeerinninnermi assigiinngissimasut, taamatullu aamma tamatuminnga ataatsimiititaliap suliarinninnerani isumaqatigiittoqarsinnaasimannigitsaq.

Ataatsimiititalialli suleriaatsimik allanngortitsinerit tamanit ilalernerqarlutik naammassiniarneqartarnissaat kissaatiginartippaa. Inatsisartut aalajangiinissaminut tunngavissaat siunnersuutilluunniit tutsuiginassusia sanngiillisinngikkaluarlugit periarfissanik nukillalaartarnernik pakatsisarnernillu pisartunik pinngitsoortitsisinnaasunik ujartuinissarnut suli piffissaqarnerunissaq ataatsimiititaliap taamaattumik pisariaqartippaa.”

Suleriaatsimut Ataatsimiititaliap isumaqatigiittup tamanna tunngavigalugu Siulittaasoqarfimmut allannguutissatut siunnersuuteqaqqullugit kaammattuuteqarpoq, suleriaatsip allanngortinneqarnissaanik siunnersuutip ilaata taassuma peerneqarnissaanik siunertaqartumik. Siulittaasoqarfiup taamatut kaammattuuteqarneq malippaa, taamaalillunilu aalajangiiffigisassatut siunnersuutit siunnersuutip allaffissornikkut aningaasatigullu kingunerisassaannik allaaserinninnermik ilaqartinneqartarnissaat attatiinneqarluni sulilu atuulluni.

Inatsisartut Allattoqarfiat tamatuma kingorna ilaasortat siunnersuutaasa ilusilersorneqartarnerat pillugu partiit allatseqarfiinik arlaleriarluni pikkorissartitsisarsimavoq, taakkunanilu, taamatullu aamma Inatsisartut ataatsimiinneri sioqqullugit partiinut allakkiaqartarnikkut, kaammattuutigisarsimallugu siunnersuutinin tunniussivissaq sioqqulluarlugu ilaasortat siunnersuusiornissaannut Inatsisartut Allattoqarfiannit ikiorserneqarnissaq ujartortaqqullugu – ilaatigut tamanna pisariaqarpat § 37 malillugu apeqquteqarnikkut siunnersuutip eqqarsaatigineqartup kingunerisassaa qulaajarneqarnissaanut paasissutissanik pissarsiniarnissamut naammattumik piffissaqarnissaq qularnaarniarlugu.

Suliniutilli tamakku malittarisassat Inatsisartut akuersissutigisimasaasa taakkuninngaluunniit Siulittaasoqarfiup atuutsitsinerata akuersarneqarnerulernerannik kinguneqarsimanerat malugineqarsinnaanngingajappoq.

Tamanna tunngavigalugu Siulittaasoqarfiup maanna siunnersuut saqqummiuteqqippaa, Suleriaatsimut Ataatsimiititaliamit, Inatsisartuni partiit kaammattuuteqarnerat tunngavigalugu Inatsisartut Suleriaasiata annertunerusumik nutarterneqarnissaanik piareersaateqartumit, ilalerneqarluni.

Tamatumunnga atatillugu oqaatigineqassaaq Inatsisartuni partiit tamarmik Suleriaatsimut Ataatsimiititaliami ilaasortaataqarmata.

2. Siunnersuummi immikkoortut pingaarnert

2.1. Inatsisartunut ilaasortat partiilluunniit aalajangiiffigisassatut siunnersuutaannut Naalackersuisut akissuteqaasiortassapput akissuteqaammilu siunnersuutip allaffissornikkut aningaasatigullu kingunerisassai allaaseralugit.

Ilaasortat partiillu aalajangiiffigisassatut siunnersuuteqartut ullumikkut pisussaaffeqarput aalajangiiffigisassatut siunnersuutip aningaasatigut allaffissornikkullu kingunerisassaannik allaaserinninnissaminnut. Ilusissanut piumasaqaat tamanna 2010-mi suleriaatsimut ilanngunneqarpoq. Aalajangersakkamut nassuiaatini oqaatigineqarpoq: ”*Aningaasaqarnikkut allaffissornikkullu kingunissat aalajangigassatut siunnersuummi nassuiarneqarnissaat pillugu ilassuteqarnikkut aalajangigassatut siunnersuutit saqqummiunneqartut*

oqaluuserinissaannut Inatsisartut naammattunik tunngavissinneqassapput. Aningaasaqarnikkut allaffissornikkullu pisariaqartitat qanoq annertutigisumik nassuiarnissaanni siunnersuutit pineqartut suuneri apequtaapput. Inatsisartunut ilaasortat aalajangiiffigisassatut siunnersuutaanni aningaasaqarnikkut allaffissornikkullu kingunissat pillugit nassuiaatit Naalakkersuisut inatsisissatut siunnersuutaannut sanilliullugit tamatigut qularnaatsuusarnaviannngitsut aammattaaq naatsorsuutigineqartariaqarpoq. Inatsisartunut ilaasortat ataasiakkaat Naalakkersuisut periarfissaatulli naliliinissamut naatsorsuinissamullu periarfissaqartannginnerat matumani pissutaavoq.”

Piffissamili qaangiuttumi siunnersuutit saqqummiunneqartut allaffissornikkut aningaasatigullu kingunerisassaasat ilaasortanut, partiinut partiillu allaffeqarfiinut missingeruminaassimapput, taamatut nalilersuisinnaaneq eqqarsaatigalugu paasissutissanik najoqqutassanillu imaaliallaannaq pissarsiviusinnaasut killeqarmata.

Taamaalilluni kingullermik ulloq 17. april 2023-imi Inatsisartunut ilaasortanut isumasioqatigiissitsinermi ersersinneqarpoq Inatsisartut aalajangiivigisassaattut siunnersuuteqarnermut atatillugu aningaasatigut allaffissornikkullu kingunerisassat allaaserineqartarnissaannik ullumikkut piumasaqaatit Inatsisartunut ilaasortanut ulluinnarni sulinermi naammassiuminaattartut.

Taamatuttaaq pakatsinarlunilu nikallornarsinnaasarpog ilaasortaq partiiluunniit qaqugukkulluunniit aalajangiiffigisassatut siunnersuummik oqaluuserisassanngortikkusutamik saqqummiussisinaanissaminit mattunneqaraangat, siunnersuutip kingunerisassaasa naammattumik qulaajarneqarsimannginnerat pissutigalugu.

Ulluinnarni sulinermi Inatsisartunut ilaasortat Inatsisartunilu partiit aalajangiiffigisassatut siunnersuusiornermiinnut atatillugu Inatsisartut Allattoqarfiannit ikiorserneqakkajuttarput, siunnersuutip kingunerisassaasa allaaserinerinut imaluunniit pitsaassusiisa qularnaarneqarnerinut. Inatsisartulli Allattoqarfiat siunnersuutip kingunerisassaasa qulaajarneqarsinnaanissaanut paasissutissanik pisariaqartunik pissarsinissaminut akuttunngitsumik periarfissaqarneq ajorpoq. Taamaattoqartillugu § 37 malillugu apeqquteqarnikkut siunnersuutip eqqarsaatigineqartup kingunerisassaasa qulaajarneqarnissaannut siunnersuuteqartoq innersuunneqartarpoq.

Aalajangiiffigisassatut siunnersuutip tunniunneqareersimanissaanut sapaatit akunnerinik tallimanik piffissarititaq sioqqullugu § 37 malillugu apeqqutip akissuteqarfineqareersimanissaata naatsorsuutigineqarsinnaannginnera aporfiusinnaavoq.

Aamma imatut pisoqarsinnaasarpog aalajangiiffigisassatut siunnersuutip eqqarsaatigineqartup kingunerisassai § 37 malillugu apeqquteqarnikkut qulaajarneqarsinnaasaratik, paasissutissanik

katersinissaq annertoq, susasaqartunit avataaneersunit paasissutissanik annertuumi pissarsiniarnissaq imaluunniit nalilersuilluni misissueqqissaarnerit imaannaangitsut § 37 malillugu apeqqummut akissuteqarnissamut killiliussat avataanniittut akissuteqarnissamut piunasaqaataagaangata. Taamatut pisoqartillugu siunnersuuteqartut siullermik misissuinissamik aallartitsinissamik imaluunniit nassuiaasiornissamik siunnersuuteqarnissaannut innersuunneqartarput. Tamannalu siunnersuuteqartumut, nalunaarusiornermut taarsiullugu massakkorpiaq iliuuseqartoqarnissaanik kissaateqartumut naalackersuinikkut anguniagalimmullu pakatsinarlunilu nikallornarsinnaasarpoq.

Aalajangiiffigisassatut siunnersuutip kingunerisassaasa qulaajarneqarsimanissaannik piunasaqaatip tamakkiisumik atorunnaarsinneqarnissaa taamaattoq isumaqarnarpoq aaqqiinerusoq pissusissamisunnngitsoq illersorneqarsinnaangitsorluunniit.

Inatsisartut qulaajarluarneqarsimasunik tunngaveqarlutik aalajangiisinnaanissaat immini pissusissamisoortumik piunasaqaataavoq, sattaaserluni aalajangiisoqannginniassammat aalajangiinerup inuiaqatigiinnut qanoq akeqarnissaata naatsorsuutigisariaqarnera, taamatullu aamma nunami innuttaasunut inuussutissarsiortunullu sunik kinguneqarnissaanik naatsorsuutigisariaqarnera nalullugit.

Taamaattumik qulaani allassimasut tunngavigalugit siunnersuutigineqarpoq allaffissornikkut aningaasaatigullu kingunerisassat allaaserineqarneri Naalackersuisunit suliarineqartalissasut. Siunnersuutikkut Naalackersuisut pisussaaffilerneqarput aalajangiiffigisassatut siunnersuutit Inatsisartunut ilaasortanit partiinilluunniit saqqummiunneqartut siullermeerneqarnerinut akissuteqaasiortarnissaminut siunnersuutillu allaffissornikkut aningaasatigullu kingunerisassai akissuteqaammi allaaseralugit.

3. Pisortanut aningaasatigut allaffissornikkullu kingunerisassai

Inatsisartunut ilaasortat partiillu aalajangiiffigisassatut siunnersuutaasa aningaasatigut allaffissornikkullu kingunerisassaasa naatsorsorneqartarnerinut Naalackersuisut Naalackersuisullu allaffeqarfiisa allaffissornermut piffissamik atuinerulernermikkut suliassaqarnerulernerat nukissanillu atuinerulernerat siunnersuutip malitsigissavaa.

Taamaaqataanik aningaasatigut allaffissornikkullu kingunerisassat naatsorsorneqartarnerinut partiit allaffeqarfiini Inatsisartut Allattoqarfiannilu aningaasatigut sulisutigullu nukissat atorneqartartut annikinnerulissapput.

Inatsisartunut ilaasortat Inatsisartunilu partiit aalajangiiffigisassatut siunnersuusiornerminnut atatillugu amerlanertigut Inatsisartut Allattoqarfiannit ikiorserneqakkajuttarput, siunnersuutip kingunerisassaasa allaaserinerinut imaluunniit pitsaassusiisa qularnaarneqarnerinut.

Inatsisartunut ilaasortat ukiuni kingullermi ataatsimiinnernermut ataatsimut aalajangiiffigisassatut siunnersuutit 60-it missaannik saqqummiussaqaqartarput. Inatsisartut Allattoqarfiata missingerpaa siunnersuutit kingunerisassaasa allattoqarfimmit allaaserineqarnerinut piffissaq atorineqartartoq agguaqatigiissillugu minutsinit 10-15-init siviluneruneq ajortoq.

Kingunerisassanik allaaserinninnerit ullumikkornit annertunerulerlutillu sukumiinerulernissaat siunnersuutikkut siunertarineqanngilaq.

Pisuni ataasiakkaani Inatsisartut Allattoqarfiat siunnersuutit kingunerisassaasa qulaajarneqarsinnaanissaanut paasissutissanik pisariaqartunik pissarsinissaminut akuttunngitsumik periarfissaqarneq ajorpoq. Taamaattoqartillugu Inatsisartunut ilaasortaq pineqartoq Inatsisartut Allattoqarfiannit § 37 malillugu apeqquteqarnikkut siunnersuutit eqqarsaatigineqartup kingunerisassaasa qulaajarniarneqarnissaannut innersuunneqartarpoq, pisariaqarpat Inatsisartut Allattoqarfiannit ikiorneqarluni.

Kingunerisassat allaaserineqarnissaannut akisussaaffiup siunnersuuteqartumiit Naalackersuisunut nuunneqarnissaanik siunnersuut § 37 malillugu apeqqutit ikilinerulaarnissaanik kinguneqarnissaa taamaalilluni naatsorsuutigineqartariaqarpoq.

Siunnersuuteqartup siunnersuutit kingunerisassaanik nassuiaateqartussaajunnaarneratigut ilaasortat siunnersuutaasa amerlilaarsinnaanissaat, taamalu aamma akissuteqaasiornermut aalajangiiffigisassatullu siunnersuutit ataatsimiititaliami suliarineqarneranut allaffissornikkut nukit atorineqartussat annertuserialaarnissaat, naatsorsuutigineqartariaqarpoq.

Ataatsimut isigalugu suleriaatsip allanngortinneqarnissaanik siunnersuutit ukioq naallugu sulisumik amerlanerpaamik affarmit ataatsimut naapertuuttumik Naalackersuisut allaffissornikkut nukissanik atuinerata annertuseriarnissaanik kinguneqarnissaa naatsorsuutigineqarpoq. Pisariaqartumilli nukissanik atuinissamut ilaatigut aalajangiiffigisassatut siunnersuutit § 37 malillugulu apeqqutit amerlassusii taakkulu sukumiinerusumik pissusii apeqqutaassapput, taamaattumillu missingiineq nalorninartortaqaalarluni.

4. Inuussutissarsiortunut aningaasatigut allaffissornikkullu kingunerisassai

Siunnersuut inuussutissarsiortunut kinguneqassanngilaq.

5. Avatangiisinut, pinngortitamut innuttaasullu peqqissusiannut kingunerisassai

Siunnersuut avatangiisinut, pinngortitamut innuttaasullu peqqissusiannut kinguneqassanngilaq.

6. Innuttaasunut kingunerisassai

Siunnersuut innuttaasunut kinguneqassanngilaq.

7. Kingunerisassai taasariallit allat

Siunnersuut taasarialinnik allanik kinguneqassanngilaq.

8. Oqartussanik suliniaqatigiiffinnillu il.il. tusarniaaneq

Siunnersuut Naalakkersuisut Siulittaasuata Naalakkersuisoqarfianut Aningaasaqarnermut Naalakkersuisoqarfimmullu piffissami XX - XX tusarniaatigineqarsimavoq. Siunnersuut piffissami pineqartumi taamatuttaaq Inatsisartut nittartagaanni tamanut tusarniaatigineqarsimavoq. Tusarniaaneq pillugu allakkiaq ilanngussatut ilanngunneqarpoq (Ilanngussaq 2).

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Inatsisartunut ilaasortat partiillu aalajangiiffigisassatut siunnersuuteqartut ullumikkut pisussaaffeqarput aalajangiiffigisassatut siunnersuutip aningaasatigut allaffissornikkullu kingunerisassaaniq allaaserinninnissaminut. Ilusissanut piumasaqaat tamanna 2010-mi suleriaatsimut ilanngunneqarpoq. Piffissamili qaangiuttumi siunnersuutit saqqummiunneqartut allaffissornikkut aningaasatigullu kingunerisassaaniq ilaasortanut, partiinut, partiit allaffeqarfiinut Inatsisartullu Allattoqarfiannut missingeruminaassimapput, taamatut nalilersuisinnaaneq eqqarsaatigalugu paasisutissanik najoqqutassanillu imaaliiallaannaq pissarsiviusinnaasut killeqarmata.

Taamaattumik siunnersuutigineqarpoq § 33, imm. 1 imatut oqaasertalerneqassasoq aningaasatigut allaffissornikkullu kingunerisassat allaaserineqarsimanissaannik Inatsisartunut ilaasortanut partiinullu ilusissatut piumasaqaat peerneqarluni. Taarsiullugu ataani nr. 6-ikkut siunnersuutigineqarpoq Inatsisartut aalajangiiffigisassaattut Inatsisartunut ilaasortat partiillu siunnersuutaasa aningaasatigut allaffissornikkullu kingunerisassaasa allaaserineqarnissaannut pisussaaffik Naalakkersuisunut nuunneqassasoq. Ataani imm. 6-imi allaaserineqartutut Naalakkersuisut namminneq siunnersuutimik aningaasatigut allaffissornikkullu kingunerisassaaniq sulii allaaserisartussaavaat.

Allannguutissatut siunnersuutigineqartukkut Inatsisartunut ilaasortat partiillu taamatut kissaateqartut aalajangiiffigisassatut siunnersuutip kingunerisannaasaatut

naatsorsuutigisaminik nassuiaateqarnissaminnut mattunneqanngillat. Taamatut pisussaaffeqartoqarunnaarnera siunnersuutip taamaallaat malitsigissavaa.

Aalajangiiffigisassatut siunnersuutip eqqarsaatigineqartup kingunerisinnaasaatut naatsorsuutigisat siumut qulaajarneqarneri ilaasortamut partiimulluunniit pineqartumut suli iluaqutissartaqarsinnaassaaq. Ilaatigut siunnersuutip kingunerisinnaasaanik siumut qulaajaareernej qulequttap taasissutissap toqqarneqarneranut pingaaruteqarsinnaavoq, soorlu aamma siumut kingunerisinnaasaanik qulaajaaneq aningaasatigut periarfissat iluanni siunnersuutit eqqarsaatigineqartut pingaarnersiorneqarnissaannut periarfissiisinnaasoq.

Nr. 2-imut

§ 33-mi imm. 2-tut aalajangersakkamik nutaamik ilanngussisoqarnissaa siunnersuutigineqarpoq Inatsisartut aalajangiiffigisassaattut Naalakkersuisut siunnersuutaasa aningaasatigut allaffissornikkullu kingunerisassaasa allaaserineqarnissaannut Naalakkersuisunik pisussaaffiliisumik. Piumasaqaat taanna ullumikkut § 33, imm. 1-imi atuarneqarsinnaavoq.

Taamatuttaaq nutaatut siunnersuutigineqarpoq Naalakkersuisut pisussaaffilerneqassasut aalajangiiffigisassatut siunnersuutit Inatsisartunut ilaasortanit partiinilluunniit saqqummiunneqartut siullermeerneqarnerinut akissuteqaasiortarnissaminnut siunnersuutillu allaffissornikkut aningaasatigullu kingunerisassai akissuteqaammi allaaseralugit.

Kingunerisassanik allaaserinnineq akissuteqaammi immikkut immikkoortumi immikkoortuniluunniit inissinneqarsinnaavoq imaluunniit pisariaqarpat akissuteqaammut ilanngussatut.

Aalajangiiffigisassatut siunnersuutit Inatsisartunut ilaasortanit Inatsisartuniluunniit partiinit saqqummiunneqartut kingunerisassaannik naliliinerit ullumikkut siunnersuummut tunngavilersuutini immikkut immikkoortuni inissinneqartarsimapput. Ulluinnarni sulinermi taakku ilanngullugit atuarlugit saqqummiunneqarneq ajorput.

Akissuteqaatit oqaaseqarluni saqqummiunneqarnerini ilanngussaajunnartut ilanngunneqarneq ajorput. Kingunerisassanik allaaserinnineq akissuteqaammi immiini immikkut immikkoortuni ilanngunneqarsimapput taamaaqataanik taassuma atuarneqarnissaa pinngitsoorneqarsinnaavoq, ullumikkut suleriaatsimut naapertuuttumik.

Siunnersuut taamaalilluni pissutissaqalersitsinngilaq Inatsisartunut ilaasortat partiilluunniit aalajangiiffigisassatut siunnersuutini saqqummiussinerannut piffissat oqaaseqarfiusinnaasut atuuttut sivikillineqarnissaat siunnersuutigissallugu, soorlu aamma siunnersuut pissutissaqalersitsinngitsoq piffissat oqaaseqarfiusinnaasut siunnersuutip

siullermeerneqarnerani akissuteqaammik Naalakkersuisut saqqummiussinerannut atuuttut sivitsorneqarnissaat siunnersuutigissallugu.

Aalajangersagassatut siunnersuutigineqartup malitsigaa Naalakkersuisut akissuteqaamminni minnerpaamik siunnersuutip pineqartup aningaasatigut allaffissornikkullu kingunerisassai allaaserisussanngormatigit. Taamaalilluni pinngitsoorani kingunerisassanik allasserinninnissap saniatigut akissuteqaatip allanik ilaqartinneqarnissaanik Naalakkersuisut pisussaaffilerneqarnissaat akissuteqaateqarnissamik piumasaqaatip malitsiginngilaa.

Taamaalilluni Naalakkersuisunut pisariaqanngilaq allatigut siunnersuut pineqartoq isummerfigissallugu. Ulluinnarni sulinermi aalajangiiffigisassatut siunnersuutit Inatsisartunut ilaasortanit Inatsisartuniluunniit partiinit saqqummiunneqartut tamarluinnarmik siullermeerneqarnerinut Naalakkersuisut akissuteqaateqartarsimapput.

Siusinnerusukkut pisuni ataasiakkaani siunnersuutininik ataatsimiinnermi oqaluuserisassanut ilanngussisoqartarsimavoq Inatsisartut Siulittaasoqarfiannik pisussaaffiliisunik inatsisissatut siunnersuummik imaluunniit Inatsisartut Suleriaasiata allanngortinneqarnissaanut siunnersuummik saqqummiussaqaarnissamut suliniutinilluunniit allanik aallartitsinissamut. Tamatumunnga maannamut Inatsisartut Siulittaasoqarfiat akissuteqaateqartuusarsimavoq.

Siulittaasoqarfiulli ukiuni kingullerni aalajangiiffigisassatut siunnersuutit Siulittaasoqarfiimmud sammisinneqartut oqaluuserisassanut ilanngunneqarnissaat pinngitsoqarani itigartittarsimavai, tassa Siulittaasoqarfik atuuffimmigut Naalakkersuisunut sanilliunneqarsinnaanngimmat, taamatullu aamma suleriaatsimi § 33, imm. 5-imi aalajangersakkap malitsigimmagu Siulittaasoqarfik, Suleriaatsimut Ataatsimiititaliaq Inatsisartuniluunniit ataatsimiititaliat allat aalajangiiffigisassatut siunnersuutikkut pisussaaffilerneqarsinnaanngimmata.

Suleriaatsip tamatuma attatiinnarneqarnissaa naatsorsuutigineqarpoq.

Kingunerisassanik allaaserinninnerup ullumikkornit annertunerulernissaa (annikinnerulernissaaluunniit) sukumiinerulernissaaluunniit siunnersuutikkut siunertarineqanngilaq.

Taamaattorli (Naalakkersuisunut ilaasortat akisussaassuseqarnerat pillugu inatsisartut inatsisaat pillugu ataani allassimasut naapertorlugit) aningaasatigut kingunerisassat eqqarsaatigalugit piumasaqaataaassaaq aalajangiiffigisassatut siunnersuut Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni killiussat aningaasartuutinullu qummut killigititassatut tassani aalajangersarneqarsimasut iluanni piviusunngortinneqarsinnaassanngippat tamatuminnga

Naalakkersuisut malugeqqusinissaat.

Taamatutaaq allaffissornikkut kingunerisassat eqqarsaatigalugit naatsorsuutigineqartariaqarpoq aalajangiiffigisassatut siunnersuutip piviusunngortinneqarnera suliassat allat Naalakkersuisut inatsisitigut inatsisartulluunniit aalajangiineratigut pisussaaffigisaasa isumagineqarsinnaannginnerinik imaluunniit piviusunngortinneqarnissaa kinguartinneqarnerinik kinguneqarnissaa naatsorsuutigineqartariaqassappat tamatumingga Naalakkersuisut malugeqqusinissaat.

Siunnersuutip kingunerisassaatus naatsorsuutigisat allaaserineqarneranni Naalakkersuisunut ilaasortat akisussaanagerat pillugu Inatsisartut inatsisaanni § 6, imm. 2-mi piumasaqaatit Naalakkersuisunut atuutissapput. Tamatuma malitsigaa aalajangiiffigisassatut siunnersuutip sunik kinguneqarsinnaanerani naatsorsuutigisat allaaserineqarnerat pissusiviusunik ersersitsiviusussaammat, taamatullu aamma kingunerisassat naatsorsuutigineqarsinnaasut pingaarutillit suugaluartulluunniit allaaserinninnermut ilanngunneqartussaammata.

Akuttunngitsumik kingunerisassanik allaaserinninneq (sapinngissamik tunngavissaqarluartumik) missingiinnermik tunngaveqartariaqartarpoq. Taamaattoqartillugu tamanna allaaserinninnermit takuneqarsinnaasariaqarpoq, soorlu aamma naatsorsuutigisat kingunerisassanik allaaserinninnermut tunngaviusimasut taaneqartariaqartut.

Kingunerisassanik allaaserinninneq pineqartunut tunngatillugu illuinnaasiussanngilaq, taamaalillunilu naalakkersuinikkut isiginiagassanik qalipaasersorneqartussaanan.

Aalajangiiffigisassatut siunnersuutip kingunerisassaasa nassuiaateqarfiginissaanut pisussaaffiup siunnersuuteqartumit Naalakkersuisunut nuunneqarnerata kingunerisa ilagissavaat eqqarsaatigineqarsinnaammat siunnersuutininik, kingunerisassaata imaaliiallaannaq nalilerneqarsinnaanngitsunik, oqaluuserisassanut ilanngussisoqartarsinnaanera. Siunnersuutip kingunerisassaasa allaaserineqarnerannut annertuumik paasissutissanik katersinissaq imaan-naanngitsunilluunniit nalilersuilluni misissuinissat pisariaqarpata Naalakkersuisut pisinnaatitaapput akissuteqaamminni oqaatigissallugu suleriaatsimi § 33, imm. 2, oqaaseqatigiinni kingullerni killiliussat iluanni siunnersuutip kingunerisassaasa sukumiisumik misissornissaat ajornartoq. Tamanna aamma atuuppoq susassaqtunit avataaneersunit paasissutissat pisariaqartut aalajangiiffigisassatut siunnersuutip siullermeerneqarnissaa sioqqullugu pissarsiarineqarsinnaanngikkaangata.

Taama pisoqartillugu Naalakkersuisut pisariaqarpat allannguutissatut siunnersuuteqarsinnaassapput suliniutip eqqarsaatigineqartup kingunerisassaasa qulaajarnissaannut § 35 malillugu nassuiaasiornissaannik Naalakkersuisunik peqqusisumik.

Suleriaatsimi § 34, imm. 2-mi aalajangersagaq naapertorlugu siullermeerinninnermi Inatsisartunut ilaasortat kikkulluunniit taamatut allannguutissatut siunnersuuteqarsinnaapput, aappassaaneerinninnermilu ataatsimiititaliaq, ataatsimiititaliami amerlanerussutillit ikinnerussutillilluunniit imaluunniit Inatsisartunut ilaasortat sisamat ataatsimoorlutik allannguutissatut siunnersuuteqarsinnaallutik.

Inatsisartut Suleriaasianni § 41-kkut Inatsisartut Siulittaasoqarfiat periarfissinneqarpoq immikkorluinnaq pissutissaqartillugu suleriaatsimi piffissaliussat, tassunga ilanngullugu assersuutigalugu aalajangiiffigisassatut siunnersuutit ataatsimiinnerup aallartinnissaa sapaatit akunnerinik tallimanik sioqqullugu tunniunneqareersimanissaannik piunasaqaatip, sanioqqunneqarnissaannut. Aalajangiiffigisassatut siunnersuut aalajangersagaq taanna malillugu oqaluserisassanut ilanngunneqarnermi kinguninngua siullermiigassanngortinneqarpat Naalakkersuisut tamanna pisariaqarpat akissuteqaammi oqaatigisinnaasariaqarpat piffissaliussatut killiliunneqartut iluanni siunnersuutip kingunerisassaasa qulaajarneqarsinnaanissaat ajornarsimasoq.

Naalakkersuisullu aamma periarfissaqarput siullermeerinninnerup kinguartinneqarnissaanik Siulittaasoqarfimmut qinnuteqassallutik, kingunerisassat pillugit nassuiaasiorterup angumerineqarsinnaannginnera innersuussutigalugu.

Aalajangersagassatut siunnersuutigineqartoq aalajangiiffigisassatut siunnersuutit kingunerisassaannut Naalakkersuisut nassuiaateqarnissaannik taamaallaat piunasaqaatitaqarpoq. Aalajangersagaq taamaalilluni aalajangiiffigisassatut siunnersuummut *allannguutissatut siunnersuutit* kingunerisassaasa nassuiaateqarfiginissaannut Naalakkersuisunik pisussaaffiliinngilaq. Taamaattorli allannguutissatut siunnersuutip kingunerisassaasa malugeqquneqarnissaannut pisussaaffik, pissutsit apeqqutaallutik, allatut tunngaveqarluni atuussinnaavoq (Tamatumunnga ilanngullugu Naalakkersuisunut ilaasortat akisussaassuseqarnerat pillugu Inatsisartut inatsisaanni nr. 6-imi, 13. maj 1993-imeersumi, kingusinnerusukkut allanngortinneqartartumi, § 6, imm. 2-p naggataatungaa takoqquneqarpoq).

Siunnersuut nutaarluinnaq pineqassanngippat siunnersuutip siunertaanik imarisaanillu tunngaviulluinnartunik allannguutissatut siunnersuutip allanngortitsinnginnissaanik piunasaqaat atuuttoq (“Suussuseqarnissamik piunasaqaammik” taaneqartartoq) taamaattoq akuttunngitsumik – tamatiguunngitsorli – allannguutissatut siunnersuutip kingunerisassaasa aalajangiiffigisassatut siunnersuutaappaartumut kingunerissanut nassuiaammit pissarsiarineqarsinnaanerannik malitseqassaaq.

Nr. 3-imut

Normulersuinerup malitsitit iluarsineqarnera pineqarpoq § 33, imm. 3 imm. 4-unngussammat

allannguutit qulaani nr. 2-mi taaneqartut malitsigisaannik.

§ 2-mut

Siunnersuutip qaqugu atuutilernissaa aalajangersakkami taaneqarpoq.

Suleriaatsimi allannguutit 1. juli 2025-mi atuutilernissaat siunnersuutigineqarpoq.

Siunnersuut ullumikkut inatsisitigut atuuttunut sanilliullugu	
<i>Oqaasertaliussat atuuttut</i>	<i>Allannguutissatut siunnersuut</i>
	§ 1 Inatsisartut Suleriaasianni 12. november 2010-meersumi, 22. september 2011-mi, 29. maj 2012-imi, 28. maj 2015-imi, 1. juni 2016-imi, 22. november 2019-imi 24. november 2022-milu allanngortinneqartumi, tulliuttut allanngortinneqassapput:
<p>§ 33. Inatsisartunut ilaasortap, partiip Naalakkersuisulluunniit inatsisiliornissamik imaluunniit inatsimmik pioreersumik allanngortitsinissamik atorunnaarsitsinissamilluunniit siunnersuutaat inatsisartut aalajangiiffigisassaattut siunnersuutitut saqqummiunneqartassapput. Siunnersuut tunngavilersugaassaaq siunnersuutillu aningaasatigut allaffissornikkullu kingunerisassai allaaserineqarsimassallutik, aalajangiiffigisassatut ilusilerneqarsimassalluni taaguuserneqarsimallunilu.</p>	<p>1. § 33, imm. 1, ima oqaasertaqassaaq: ” Ilaasortamit, partiimit Naalakkersuisunilluunniit inatsisiliornissamik imaluunniit inatsisiliornernik atuuttunik allanngortitsinissamik atuukkunnaarsitsinissamilluunniit siunnersuutit Inatsisartut aalajangiivigisassaattut siunnersuutitut saqqummiunneqartassapput. Siunnersuut tunngavilersugaassaaq, aalajangiiffigisassatut ilusilerlugu allanneqarsimassalluni qulequtserneqarsimassallunilu.”</p>
	<p>2. § 33-imi imm.1-ip kingornanut immikkoortutut nutaatut ilanngunneqassaaq: ” <i>Imm. 2.</i> Inatsisartut aalajangiiffigisassaattut Naalakkersuisut siunnersuutaasa aningaasatigut allaffissornikkullu kingunerisassaasa allaaserineqarnissaat Naalakkersuisut pisussaaffigivaat. Inatsisartut aalajangiiffigisassaattut siunnersuutit Inatsisartunut ilaasortanit partiinilluunniit</p>

	<p>saqqummiunneqartut siullermeerneqarnerinut akissuteqaateqarnissartik Naalakkersuisut taamatutaaq pisussaaffigivaat. Akissuteqaammi siunnersuutip aningsaatigut allaffissornikkullu kingunerisassai aallaaserineqarsimassapput.”</p> <p>Imm. 2-8 tamatuma kingorna imm. 3-9- nngussapput.</p>
<p><i>Imm. 6.</i> Siunnersuutit imm. 1-imi aamma 3-mi taaneqartut saniatigut Naalakkersuisunit siunnersuutit tulliini taaneqartut Inatsisartut aalajangiiffigisassaattut siunnersuutit suliarineqartassapput:</p>	<p>3. § 33, imm. 6, oqaaseqatigiit siulliit, imm. 7, oqaaseqatigiit siullinngortussat, ima oqaasertaqassapput: ” Siunnersuutit imm. 1-imi 4-milu taaneqartut saniatigut Naalakkersuisunit siunnersuutit uku Inatsisartut aalajangiiffigisassaattut siunnersuutit suliarineqartassapput:”</p>
	<p style="text-align: center;">§ 2</p> <p>Allannguutit 1. juli 2025-mi atuutilissapput.</p>

Tusarniaaneq pillugu allakkiaq